

元


詩

紀

事

第二冊

PL
2534
.C4
v.2



元詩紀事卷六

侯官陳衍緝

葉林

林字儒藻一字元文

去一文作

號本山錢唐人生宋末隱大滌山

沖天觀大德間卒衆稱高行先生

至道宮

猶存鼎鑊記熙豐翠靄春深古路通千百春鋤一株樹野田吹下雪
花風

洞霄圖志至道宮在餘杭縣北三十里曹橋西唐文明元年
建前有古松一圍兩合抱後有苦杏二大與松埒鶯鶴巢集
其上廚院有宋熙甯閒所鑄巨鑊四畔識歲月及施錢姓氏

YORK UNIVERSITY

JUN 5 - 2001

EAST ASIAN STUDIES

隱士葉元文詩云云

絕句

金粟花前風細細
寶階地上月輝輝
夢回不屬紅塵境
涼露滿衣人醉歸

句

芙蓉搖風柳挂月
醉來健倒梨花堆

吳禮部詩話葉公詩如金粟云云他警句如芙蓉云云千百
春鉏云云皆佳

鄧牧

牧字牧心錢唐人隱大滌山人稱文行先生著有洞霄圖

志雜文稿名伯牙琴

寄友

我在越君在吳馳書邀我遊西湖我還吳君適越遙隔三江共明月
明月可望佳人參差笑言何時寫我相思知君去掃嚴陵墓祇把清
尊酌黃土浮雲茫茫江水深感慨空勞弔今古孤山山下約陳實聯
騎須來踏春色西湖千樹花正繁莫待東風吹雪積有酒如澠有肉
如陵鼓趙瑟彈秦箏與君沈醉不用醒人生行樂耳何必千秋萬歲
名

吳禮部詩話李坦之早歲入道洞霄宮學文於隱者鄧牧有
葉林者亦隱山中坦之出山時時誦葉鄧詩鄧有寄友云云

陳觀國

癸辛雜識陳觀國字用賓永嘉勝士也丙戌之夏寓越夢訪

予於杭壁間有古畫數幅巖壑聳峭竹樹茂密瀑飛絕巘匯
爲大池池中菡萏方盛開一翁曳杖坐巨石上仰瞻飛鶴翔
舞烟雲空濛中髣髴有字數行體雜真草其辭曰水聲兮激
激雲容兮茸茸千松拱綠萬荷湊紅爰宅茲巖以逸放翁屹
萬仞與世隔峻一極而天通予乃控野鶴追冥鴻往來乎蓬
萊之宮披海氛而一笑以覩九州之同傍一人指云此放翁
詩也用賓驚寤急書以見寄詩語清古非思想所及異哉

送鄧牧心出陶山

青山無送迎幽人自來去落葉若相送卷卷及行屨簷端有孤雲仍
爲守其處落葉惜人不在山孤雲尙期人再還斯人可期復可惜我
處落葉孤雲間

吳禮部詩話牧心嘗客會稽王脩竹監簿所有陳觀國用賓
送其出陶山詩亦佳

劉壘

壘字起潛號水村南豐人宋亡十餘年薦署昭郡學正又十
餘年命爲延平教授有水雲邨稿

補史十忠詩

知潭州湖南安撫使李公

帶

三已甘退休十連起遲暮伊誰急求子流落乃不怒黑雲來如山殺
氣震平楚恭惟君父命封疆以身護闔門義不辱呼卒汝善處飛魂
隨劍光自己投火去天泣鬼神愁地搖山岳仆吾非莒柱厲敢以死
醜主正自常事耳命義逃安所冲遠誰與儔睢陽有張許

吉
冲
丁
穆
字
祖

池州通判權州事趙公

人卯發
妻雍昌
氏州

若人作何狀立節乃殊偉人言此蜀珍位卑名未起坐分秋浦月攝
此千里寄沙頭風色惡寒城凜弘峙吾聞開關迎棄遁亦復恥茲惟
城郭臣大義吾知己間道走帛書灑血別玉季細君絕可人雙飛同
一死南八彼男兒此婦乃如此骨朽香不廢吾詩當青史

丞相都督信國公文公

天祥
狀元

時平輒棄置事迫甘前驅嗚呼忠義臣匪直科目儒江寒朔吹急列
城同一趨豈不寄便安綱常乃當扶移檄倡諸鎮奮袂躬援枹川決
莫我回萬險棲海隅天乎復不濟道窮竟成俘一死事乃了吾頭任
糝糊悠悠譏好名責人無已夫三衢有魁相投老作尙書

三衢
留魁
相

參政行丞相事陸公

秀夫

天地無託足海天同隰光明知復何爲不忍墮三綱裸薦覬少延謳
歌寧遠忘或者莒在齊聊且帝一方竭蹶竟委頓臣謀非不臧運去
天莫留力盡心彌強終不負吾主名義天地長懷璽隨龍遊舉室水
中央斯人文華士乃爾百鍊鋼機雲儻通譜應羞朝洛陽

前左丞相江文忠公萬里弟

萬頃

匡廬雲錦屏鴻儒產其下風神儼如龍夭矯莫可駕卷懷經濟具娑
婆洛中社怪事玉牀搖清晝天忽夜突騎從何來陰風飄屋瓦大臣
義有死欲避吾不暇庭前環止水萬事付一捨從容友靈均朝野動
悲咤愍章極哀榮汗簡誰記者倘有南熏書季方足堪亞

江西制置司都統密公

備

臣有致身義豈計官崇卑偏將知死忠不曰天下奇漢節旣披靡失位趨江西閫帳駐臨汝招徠樂其歸雪寒南浦愁羽檄蘄濟師一將奮風虎鼓行亟颿馳踰嶺疾戰苦裹瘡呼健兒坐縛膝不屈伏鑕甘如飴小臣裨校耳職也宜死綏廬州大將在白首豎降旗

淮東制置使知揚州李公

庭芝

淮海接風塵胡乃似鐵壁臥護有天人十載藉福力重來人未老愁絕事如昔苦戰孤城危痛哭天柱折夢遊三山上人倫浮海出突圍志南征吾欲重建極天弗鑒臣忠冥冥墮叢棘先軫面如生萇弘血化碧臣死誰復知臣忠終不易一將更大事嚼舌死罵敵

樞密閩廣宣撫使陳公

文龍
長狀
元戊

淳熙名宰孫比德粹如玉決科魁偉英駉駉薦冠肅類田煩諫疏相

嗔俄喉逐補郡仍免歸黃流已漫陸天族日光薄力疾支顛覆蹉跎
南冠縶道病死不辱往昔五峯堂傾蓋語跋燭斯人眞妙人哀哉慳
厚祿長捐丙辰魁各天並黃鵠不有二忠存千古笑科目

少傅樞密使張公

世傑

士有守節死豈以責武夫武夫尙能奇消得銀管書何許熊虎英鐵
面美髯須護寒久枕戈赴難甘捐軀金山定活著志願嗟違初江心
集羣策炎精回一噓間關障海濱萬死存趙孤時也可奈何北風散
檣烏漂漂竟何之無乃膏鯨魚渭濱多貴將反笑斯人迂

四川制置使知重慶府張公

珪

坤維拓提封形勝古天府血戰五十秋零落餘八柱江南傳箭急誰
暇此回顧落日古渝城杖鉞乃甚武天東甌雖墮吾自強支柱渡瀘

躬討逆歸來戰牘苦蕭條下夔門機穽伏中路咄咄快敵仇誰歟掩
坏土哀哉關西雄國亡猶不負同時督軍將腰金插雙虎

符遠撰水村先生傳年三十七而宋亡時多死節之臣恐其
名行不傳作補史十忠詩

水雲邨吟稿自跋右襄園以來死忠者蓋不止此然多所不
知知其詳且顯者莫如此十公故先賦此十詩尙竢續書以
著大節噫十詩存卽十忠不亡十忠不亡吾十詩亦永存矣

賈似道

三百餘年曆數更東南萬里看昇平黃金臺上麒麟閣混一元勳是
賈生

隱居通議一代之亡必有一誤國者爲人所指目見於吟詠

自唐以來賦者多矣雖機軸不免相同然誅姦諛於旣死誠千古之一快不可議其蹈襲也如唐彥謙詠文惠宮人云認得前家令宮人淚滿裾不知梁佐命全是沈尙書李太白觀詠漢宮云哀平外立國權分只爲當時乏嗣君試問莽新誰佐命祇應飛燕是元勳鄭毅夫獬詠范蠡云十重越甲夜成圍宴罷君王醉不知若論破吳功第一黃金只合鑄西施趙漢宗詠張麗華云陳事分明屬綺羅香塵吹盡井無波行軍長史何勞怒次第論功妾更多予叔長秋麓翁詠陳後主亦云晉王前殿賀平陳從此江南雨露均四百年間重混一誰知江令是勳臣宋之失國賈似道爲之也余竊嘗爲之詩云

王義山

義山字元高富州人宋景定壬戌廷試乙科授永州司戶入元行中書省聘教授路學掌江西學事有稼村類藁

句

詩思已隨春意動夜衾不怕曉寒新 一枝瀟灑無塵浣半夜高寒對月明 滿斟綠竿安排醉牢裹烏紗照顧吹

元詩選如齋居雜興云云贈陳梅垣云云和紫極登高韻云云亦復刻意求新

傅定保

定保字季謨號古直晉江人宋咸淳中禮部奏賦第四大德初薦授漳州路學正

四賢祠次韻

四傑唐遺跡千年此妥靈
草荒丞相冢雲鎖隱君亭
助教衣猶綠翰林山尙青
因懷水南令愁思遶春汀

泉州府志四賢祠祀唐姜公輔
秦系韓偓席相按詩中助教
衣猶綠句疑所祀乃歐陽詹
非席相也

張伯淳

伯淳字至道杭州崇德人
宋舉進士除太學錄入元用
薦官至侍講學士有養蒙先生集

句

瘦筇支予于狹路寫之玄
纔從國子先生出曾是分司御史來
一廉宜得能官譽垂去還如始至時
曾觀海者難爲水自出山來

無此遊 幕中頗見此客不江左喧傳某掾來

元詩選佳句頗多如出郊云云送王士能赴衢州同知云云
望梅樓云云送張從之臺郎云云覺意深語健耐人吟諷也

洪德章

德章字巖虎

句

有子定知吾事足貧家頗覺此聲佳 風露對檠逼詩父雲煙落紙
凜草兒

續軒渠集王鳳靈叙吾鄉先正教諭洪吾圃先生當有宋末
運不樂仕進遜肥蓄識以詩律自鳴所著有軒渠集若干首
其仲子訓導希文號去華山人妙承宗旨嘗與夜半談詩渠

然樂適故其詩有云云集之名軒渠以此惜今散落不見其
全其所存者惟去華山人續軒渠集而已

尹廷高

廷高字仲明別號六峯遂昌人遭亂宋亡二十年始歸故鄉
嘗掌教於永嘉有玉井樵唱正續集

遊太虛觀臨池賦

路入煙蘿別有天我來散髮坐風軒玉峯積翠花香潤石洞藏丹雲
氣溫水影倒棲松頂鶴谷聲遙答嶺頭猿箇中妙處誰能畫寫入篇
章當草元

玉井樵唱自注水影一句竟不能偶大兒祖憲以谷聲云云
爲對亦粗可用因足成篇

趙棠

棠字國炎

弔瓊花

名擅無雙氣色雄
忍將一死報東風
他年我若修花史
合傳瓊花烈女中

山房隨筆揚州瓊花天下祇一本
士大夫愛重作亭花側扁曰無雙
德祐乙亥北師至花遂不榮
趙棠國炎賦絕句弔之連文鳳

文鳳字伯正三山人

春日田園雜興

老我無心出市朝
東風林壑自逍遙
一犁好雨秧初種
幾道寒泉藥

旋澆放犢曉登雲外壘聽鶯時立柳邊橋池塘見說生新草已許吟魂入夢招

月泉吟社第一名評曰衆傑作中求其粹然無疵極整齊而不窘邊幅者此爲冠

月泉吟社序浦江吳渭宋時嘗爲義烏令元初退食於吳溪延致鄉遺老方韶父與閩謝臯羽括吳思齊主於家始作月泉吟社四方吟士從之三子者乃爲其評較揭賞云

又送詩賞小劄序預於丙戌小春望日以春日田園雜興爲題至丁亥正月望日收卷月終結局收二千七百三十五卷選中二百八十名三月三日揭榜

送詩賞劄伏以月泉吟社久盟湖海之交春日新題賸寫田

園之興得周南而正始可冀北之空羣執事振響武林舒翹
文苑種秧澆藥已朝市之無心放犢聽鶯更池塘之入夢杼
機自別冠冕爲宜某心所甚欣手之不釋詩成奪錦誦珠玉
者翕然禮以爲羅愧瓊瑤則多矣餘如元穎并致篋篋

回送詩賞割讀淵明詩久識田園之趣從夫子學願爲農圃
之民未敢望其下風胡遽延之上座執事雅懷月霽清思泉
寒某羨珠玉之在側忝糠粃之播前舊擬秋聲曾占桐江之
風景新題春日又分婺女之星輝豈好爲朱公之變易姓名
深恐蹈柳子之召閤取怒慙非重寶俾獲與錦囊之榮賜侈
香羅復喚起青衫之夢受絲毫而皆感與筆墨以忘言謹述
謝私伏祈鑒在

案來往小劄各二十餘首錄一首以概其餘

馮澄

澄字澄翁義烏人

前題

編闌春思倩吟鞭著面和風軟似綿黃犢烏犍秧穀後雄蜂雌蝶菜
花天把鋤健婦踏煙壟抱甕丈人分野泉忙事關心在何處流鶯不
聽聽啼鵲

月泉吟社第二名起善包括兩聯說田園的而雜興寓其中
末語亦不泛

楊本然

本然字舜舉金華人

前題

春風建業馬如飛誰肯田園拂袖歸栗里久無彭澤賦松江僅有石湖詩踏歌槌鼓麥秧綠沾酒裹鹽菘芥肥吳下風流今莫續杜鵑啼處草離離

月泉吟社第七名起敍石湖出處善黏綴本題領聯引淵明爲對語有斟酌頸聯就范詩狀田園結有悠揚不盡之興此詩若止如前半篇則於義當屬賦矣

又

露畦煙陌裏名利等秋毫引犢隨牛放祈蠶望繭縑和根挑薺菜帶葉摘櫻桃讀罷歸來賦臨風欲和陶

月泉吟社第三十六名有點檢無疎漏二聯能以俗爲雅和

根帶葉雖只舊對卻轉移得好末押和陶更佳

全璧

璧字君玉杭人

句

前題

晉氏衣冠門外柳幽人風俗屋邊桑 未分東風欺老眼一編牛背
臥斜陽

月泉吟社第九名見趣高格調別觀前題八字及末句語可想其人

呂文老

文老字澹翁東陽人

前題

月笛紀聞附青煒民野陶然化日熙祀備粉榆祈稔歲宴酣花柳樂
清時洛中富貴斜陽恨錦王勳勞千古思浩興歸來吟不盡陶詩和
後和幽詩

月泉吟社第十名引用田園事全與諸作不同覃思一至於
此末句亦縝密

方德麟

德麟字藏六桐江人

前題

繞畦晴綠弄潺湲倚杖東風却黯然往夢更誰憐秀麥閒愁空自託
啼鵲犁鉏相踵地力盡花柳無私春色偏白髮老農猶健在一簑牛
背聽鳴泉

月泉吟社第十一名送詩賞劄執事望簪東安羣稱北冀晴
畦自繞鵲聲謾寄於閒愁春色雖偏牛背獨誇於老健細觀
妙格知出清芬云云

劉汝鈞

汝鈞字君鼎三山人

句

前題

草坪閒見烏犍點畚水飛來白鷺雙

月泉吟社第十二名意圓語妥五六善寫物態用韻尤工

翁合老

合老字仲嘉建德人

前題

韶華到處入冥搜郭外人家事更幽土脈正融催穀鯨林陰微合聽
鉤輅誰家酒熟社公醉明日桑空蠶妾愁祇恐春工忙裏度又吟風
雨滿城秋

月泉吟社第十五名春日雜興意已具首句二聯工緻後聯
句更高結句所引與興字相關尤有深味

林子明

子明號東岡分水人

前題

一點陽和薰萬宇最饒佳致是山莊雞豚祝罷成長席鶯燕聽來隔
短牆嗜酒不嫌多種秫無襦長恨少栽桑東郊勸相何煩爾農圃吾
生自合忙

月泉吟社第十六名前聯細玩見田園次聯較分曉結意尤有含蓄

劉蒙山

蒙山字 崑山人

句

前題

村婦祈蠶分麪親老農占歲說泥牛田鳥飛逐耕煙犢桑扈鳴隨喚
雨鳩

月泉吟社第十七名此真雜興二聯組織甚工

周陳

陳字伯陽泰州人

前題

蛙聲似吹雨初足桑樾欲紅風始和少婦每憂蠶利薄老夫惟喜秫
苗多舊栽花木山鶯識新買陂塘野鷺過此境東風元自好當年金
谷事如何

月泉吟社第十九名不事排纂而意語新妥自是佳作

趙必范

必范號古一宋太宗十世孫桐江人

句
前風

卜歲聊憑六壬課有生未識五辛盤元幸有漁樵同此樂苦無車馬

自相諠元幾點飛花芳徑雨一雙新燕荻簾風社菱白生苗藏蛤地

桑黃含樾浴蠶天清

月泉吟社第二十名此卷八詩一起一結中六篇分詠三春

節序曲盡田園間景態如云云皆佳句也

姚潼翔

前題

壁寫新年百事昌春盤次第蓼芽香燒燈過了爭挑菜祭社歸來便
撒秧布穀幾聲催耜畝吳蠶三伏正條桑一春忙過無多日又聽鷓
鴒報麥黃

月泉吟社第二十一名送詩賞劄執事氣孕蒼泱學宗葩正
以俗爲雅一年先百事之書因險出奇八句盡三春之景云
云

胡南

南字景山義烏人

前題

世數有遷革田園無古今鳥喧爭樹暖牛倦憩牆陰水活土膏動風
微花氣深淵明千古士佇立此時心

月泉吟社第二十四名二聯俱入細末意尤永

姜霖

霖字仲澤金華人

前題

老盆傾酒試新嘗社鼓村村鬧夕陽麥隴風微牛睡穩芹塘泥滑燕
歸忙半村飛雨斷煙濕一徑落花流水香鼎貴安知此中意徒能學
犬吠村莊

月泉吟社第二十六名領聯妥帖五六語尤勝末不雷同

東必曾

必曾字孝先杭人

前題

嚙綠郊原春事深
治生幽趣豁塵襟
聲禽語耕人意
種種花開老圃心
桑葉漸舒梯欲整
麥苗暗長路難尋
日長雖有荷鋤倦
薄暮歸來常醉吟

月泉吟社第二十七名終篇可謂清新之作三四尤有味

方子靜

子靜字 桐江人

句

題前

秧水平疇蛙閣閣
菜花滿稜蝶飛飛
比鄰社酒歡猶在
牆壁農書事

已非

月泉吟社第二十八名額聯停當五六有感觸三四字尤警

朱孟翁

孟翁字

東陽人

前題

餽釘蔬槃已竹萌如何布穀未催耕牧兒嬾散騎牛過遊子牽連信
馬行秧際窺魚翹白鷺花間捎蝶下黃鶯東風歲歲添新綠獨我霜
髭多幾莖

月泉吟社第二十九名平安中用字有工二聯不拘體貼而
題自見末感興尤深

趙必拆

必拆字 杭州人

前題

一段佳山水芳時事正妍
犢耕青燒雨鶴臥碧桃煙
社老邀嘗煮鄰僧伴摘鮮
莫嫌陶令拙農圃得餘年

月泉吟社第三十名送詩賞
劄執事愛雲自命與世相違臥
碧耕青慣尋幽趣摘鮮嘗煮閒
對芳時宛如驢上風雪詩不
帶人閒煙火氣云云

劉時可

時可字 雙溪人

前題

土膏初動雨初收
草逕茅亭趣最幽
坐睡略無朝市夢
踏歌時有里

園遊半邱佚疏醉堪酒五畝樹桑寒可裘老圃老農誠足學不成吾
道付滄洲

月泉吟社第三十二名前聯語圓味永後四句婉順而有結
束

許元發

元發字 義烏人

前題

片雲豈是出山時曾被東風誤一吹歸意不煩啼鵲勸閒情只許落
花知桑麻窮巷扉常掩煙火空林黍自炊栗里輞川非謬計晴窗仔
細味渠詩

月泉吟社第三十四名起善摹寫五六用淵明摩詰語卻以

第七句承之可謂得格

洪貴叔

貴叔字 義烏人

前題

棄官杜甫罹天寶辭令陶潛歎義熙暖日浣溪仍舊迹春風栗里只
前時苗生阡陌培嘉種花繞林塘發故枝佳興二公能領會可能胸
次太多詩

月泉吟社第三十五名全倣坡體

徐端甫

端甫字 義烏人

句
前題

犬依桑下鳥健臥鳩雜花閒黃鳥呼楊柳嫩搖風氣力稻秧新著雨
工夫

月泉吟社第三十七名如是而後爲雜興詩中二聯尤得趣
末無奇

朱釋老

釋老號龜潭金華人

前題

家山萬象春歸好詩筆拈來感物情泉脈動時毋待灌土膏起處正
宜耕無窮懷抱風和暢不盡形容雨發生試問封侯萬里客何如守
拙晉淵明

月泉吟社第三十八名前聯說田園輕快第二句體貼興字

五六帶春景體貼雜興二字更工然而氣格不高亦坐此

李萼

萼字 桐江人

前題

村居只是舊衣冠北墅南園熟往還
雨外泥深牛轂棘花邊風暖鳥
間關躬耕自得莘郊樂日涉誰知
陶徑閒只說桑麻元自好不須釋
耒歎時艱

月泉吟社第三十九名全篇辭氣雍容末韻哀而不傷怨而不怒深得詩人之旨

陳君用

君用字竹臞

前題

春風冗我田園務野思芳情約不齊
檢點瓜邱仍芋壟按行桑墅更
秧畦偶陪靈運山前展或學東坡
雨外犁薄暮倦歸專一事旋誅生
榮甕黃齋

月泉吟社第四十名雜興甚工但失之刻露然其好處亦在此

句
前題

芽穀驗仁脈澆花趲化工

月泉吟社第四十六名前聯平後聯有思索

蔡潭

潭字熙山杭人

前題

雲過催花雨風收困麥煙一鋤天地裏三月翠紅邊朝市雖無夢郊墟似有緣種瓜何代叟豈識趣熙然

月泉吟社第四十一名詩人詩韻度自別起聯甚工

俞自得

自得號吟隱金華人

句

題前

白鷺時窺秧刺刺黃鶯頻說柳依依幾回野水聞姑惡數樹春陰叫姊歸

月泉吟社第四十二名語新而對巧所謂多識於鳥獸草木之名但末二句不過敷衍起句耳

王進之

進之字

建德人

句

韻前

桑田滄海幾興亡
歲歲東風自扇揚
細麥新秧隨意長
閒花幽草爲誰芳

月泉吟社第四十七名有悠長味無艱澀語後半篇視前略不及

又

物意豈知滄海變
曉風依舊語流鶯

月泉吟社第四十九名以雅健語寫高潔操悠然之興見於篇末

陳希聲

希聲字

義烏人

前題

香紅眩眼纈蕤英竹杖扶吟縱步行
桑眼蟆含青蕾小麥鬚蝦磔翠
芒輕黃花菜圃午風軟綠水秧畦春野平
芳樹幾聲鳩雨過蒼蒼柳
色弄煙晴

犁鉏徧野沸耕農血吻鵲聲一樹紅
畦蠹秧針青剡剡隴翻麥浪翠
芄芄雞鳴晝寂花村雨蛤吠朝寒草岸風
溪外雲過橫笛亂微煙野
色樹龍蔥

月泉吟社第五十名回文二首俱妥順亦出苦心又第五十
一名三春分作三首曲盡變態非苟爲敷演者所能及

陳堯道

堯道字景傳義烏人希聲子

前題

化日村田樂春風耕織圖秧肥科斗動桑暗鵲鳩呼社罷翁分胙蠶
占媼得符傍花隨柳處此事不關吾

月泉吟社第八名起聯有力五六亦新傍花隨柳人多正說
此乃翻用之意新

陳舜道

舜道字景宗堯道弟

前題

春來非是愛吟詩詩是田園樂興時清入吟懷花月照紅生笑面柳

風吹村聲盪耳烏鹽角社酒柔情玉練槌閒悶閒愁儂不省春來非是愛吟詩

月泉吟社第三十一名此卷首尾吟十篇題上生題摹寫各極其妙與其他畫蛇添足者不同姑置諸此以爲手抄之冠紙價當爲高矣

案今錄一首

升庵辭品曲名有烏鹽角江鄰幾雜誌始教坊家人市鹽得一曲譜於角子中翻之遂以名焉戴石屏有烏鹽角行元月泉吟社詩山歌聒耳烏鹽角云云

蠶尾集村歌聒耳云云宋末月泉吟社中佳句也山居雜誌載杭人徐炬酒譜乃引作少陵詩

吳璫

璫字貴叔義烏人

前題

野水渾邊戲乳鵝疎籬缺處曬耕蓑草青隨意牛羊臥門靜無人燕
雀多夫倦倚犁需婦饁翁歡擊壤和孫歌新來別有營生計又喜巡
檐住蜜窠

月泉吟社第二十三名全篇是雜興本色而田園參貫其中
且無一語塵腐

黃景昌

景昌字清遠浦陽人

浦陽人物記晚自號田居子述田閒古調辭九章賓客至輒

揭甕取酒共飲酒酣取辭歌之以筴擊几爲節音韻激烈聞者自失不知世上有貴富也

前題

野色搖春麥正肥煙村閒寂往還稀未多桑葉蠶初浴更小茅茨燕亦飛行市綠蛆花潑眼臥依黃犢草侵衣數聲桐角歸來晚楊柳移陰月半扉

月泉吟社第二十五名細潤中見雜興若知田園傳亭則有當進盧前矣

劉應龜

應龜字元益義烏人宋咸淳間游太學至元二十八年部使者起主教鄉邑官至杭州學正

黃文獻集所著爲夢稿六卷癡稿六卷聽雨留稿八卷識與
不識者皆稱之曰山南先生潛之蒙鄙劣弱弗失身負販者
先生教也

句

耕餘樹有牛磨癢稅足溪無人照癭 青春却付鳴鳩管白日全輸
臥犢閒

月泉吟社第五名此卷七言凡六首律細韻高如云云等語
豈未易及鼎嘗一嚮餘可概知

劉邊

邊字近道建安人有自家意思集

句

耕鉏曉雨有餘地應接東風無暇時

月泉吟社摘句圖聯句云云

戴東老

前題三首

錄一

飲了椒盤收了燈翁攜稚子步新晴茅柴初熟勝臘醞萊蕪久齋宜
晚羹伏卵雞留上春種出欄牛試吉辰耕去年官賦今年罷寂甚柴
門犬吠聲

月泉吟社第五十二名三詩狀三春之景得處亦多起頭一
句欠嚴重

陳文增

文增字

茗水人

句
題前

熙熙畝扇和風簇簇人煙野意濃
飲牛湖暖山搖影接果枝青
蘇坼封

月泉吟社第五十四名起見題意兩聯中五六尤工

劉存行

句

麥苗花下綠犢子草邊黃

傅宣山

又

生意滿腔秧出穀飛花有絮柳飄綿

柳耆

又

野犢正忙犁曉雨谷鶯纔出管東風

俞如山

又

鳥隨牛後窺秧穀蝶趁蜂來戀菜花

翁自適

又

鴉趁犁翻爭啄食蜂黏絮落苦貪香

郭建德

又

煙連草色迷平野雨趁鳩聲過別村

駱備賓

又

烹罷籛龍新上筮修來秧馬尙依牆

陳帝臣

又

清曉蛙聲引啼鵲夕陽牛背立歸鴉

俞堃山

又

郎罷耕田呼囷牧阿翁眠起問姑蠶

林泉生

又

桃李公門者將蕪胡不歸

傅九萬

又

笑他思著蓴鱸者却感秋風始去官

月泉吟社摘句圖起句云云聯句云云結句云云

章彬

彬字 吳人

白鵬詩

草暖蘋香月上遲白鵬黃鶴往來時雲山隔斷一千里日日相過人不知

晉安逸志宋咸淳間福州進士陳嘉言號書隱以對策忤賈

元譜系事卷二
似道斥授建州司戶嘗畜黃鶴白鵬出入與俱銜書往來景
炎丙子元師入建州書隱遂歸福州去建州千里而遙二禽
傳命不閒晨夕時章彬避地建州慕書隱之風託詩以交一
日書隱待月江上忽白鵬至得詩云云神交二十餘年彼此
不識面

彭九萬

九萬字好古崇安人至元二十年黃華作亂遇害

凌波辭賦水仙花

歲芳兮婉冉悲江空兮蘭榭歸人嬋媛兮何來遲憺風魂兮佩誰思
素衣兮儼黃裏玉襦兮明翠被明波渟渟兮渺愁予含香懷春兮中
心苦昔遺襟兮今契闊佇佳期兮宵修絕幻塵緣兮蹇中憂時旣晏

兮不可留汎雲輶兮水裔紕余瑟兮難理人奚歸兮路蒼茫湘有皋
兮春綠起

萬姓統譜蓋淪淪有楚騷風調焉

方譜系要

一
二
三

元詩紀事卷七

侯官陳衍縉

戴表元

表元字帥初慶元奉化人宋咸淳中登進士乙科官臨安教授入元爲信州教授

剡源集自序執政者薦授一儒學官因起教授信州大德丙午歸自信州自號曰剡源先生因以名其集或稱質野翁充安老人云

感舊歌者

牡丹紅頭豔春天檀板朱絲錦色牋頭白江南一尊酒無人知是李龜年

西湖志餘戴帥初湖上贈歌者一絕有故國之思焉

熊朋來

朋來字與可豫章人宋咸淳登進士第入元仕爲教授

豫章鐵柱宮

九牧失黃金司空不行水蛟龍弄波濤魑魅入城市吁嗟清談者萬事謾不理遂令千載人稽首旌陽子

江西通志豫章鐵柱宮井中鐵柱歷代名賢多有題詠熊朋來詩云云

吳澄

澄字幼清撫州崇仁人宋末領鄉薦至元二十三年徵至京師以母老辭歸後官至翰林學士諡文正有草廬集

揭傒斯撰神道碑皇元受命天降眞儒北有許衡南有吳澄
道園學古錄嘗作草屋數間而題其牖曰抱膝梁父吟浩歌
出師表程文憲知其意題之曰草廬學者稱之曰草廬先生
詩法正論郝伯常有言自李杜蘇黃已不能越蘇李而追三
代矧其下者乎於是近世不復知有李杜又焉知三代性情
風雅之作哉草廬吳先生感興詩亦云周詩三百餘離騷二
十五自從蘇李來萬變不復古皆謂是也

題簡齋陳參政奏稟後

君臣密勿紹興中文物依稀貞觀風三幅奏篇存雅製諸家題字總
名公已聞玉匣人間見空想銀鈎天上工百八十年如一夢摩挲遺
墨視夢夢

吳文正集紹興參政簡齋陳公奏藁三幅其一謝御賜臨王
羲之玉潤帖其二爲奉旨辨歐陽詢書真僞淳熙紹熙葛周
洪尤謝楊章樓以至慶元嘉泰開禧諸名公題跋者凡十八
人蓋百八十年于茲矣澄得肅讀感慨繫之臨川吳澄謹書

詠雪

臘轉鴻鈞歲已殘東風剪水下天壇
賸添吳楚千江水壓倒秦淮萬
里山風竹婆婆銀鳳舞雲松偃蹇
玉龍寒不知天上誰橫笛吹落瓊
花滿世間

疊葉梅

羅浮夢斷杏無蹤冰雪仙姿兩兩逢
縞袂怯單寒後襲彩妝嫌薄曉
來濃迎風一笑知顏厚臨水相看見影重
道眼只將平等視玉環飛

燕總天容

句

百年竹木青春在一院香花白晝閒
屋頭月上元無夜樹杪風來
若有期 花香靜晝微風裏草色深春一樹餘
金鏡南飛光欲半
銀潢西去寂無聲 定非戰國談天衍疑是仙家縮地房
秋隴故園迷蝶夢曉窗客枕壓雞聲

筆精吳草廬專志理學而詩亦多巧思詠雪云云疊葉梅云
云又如云云等句皆超脫理學蹊徑者也

又

浩歌歸去渾無事栖碧山前月上東

吳文正集龔舜咨一旦幡然而去別予於禁林曰吾欲歸玩

元譜系卷七
三
栖碧山中之月予甚高之贈之以詩末句云云

倪南杰

南杰字君立上饒人咸淳間秋貢與選至元間省差徽州路學正官未滿歸

句

夕陽影裏行人遠春鳥聲中歸興忙

吳文正集吟詠自適爲佚老計尤樂佳山水嘗游盱有云云之句繼游淞徧覽奇勝成詩一帙曰淞水漁歌

胡長孺

長孺字汲仲號石塘婺州永康人咸淳中授迪功郎至元中世祖召見官至甯海主簿有石塘稿

元儒考略胡長孺與高彭李湜梅應春等號南州八士

題段郁文雪石

白雲飛來著春空
翕霍變化生奇峰
朝曦照耀舒復卷
碧華忽擁玻璃宮
秋潮初壯明於雪
千雷動地吳山裂
濤頭出海夕陽微
百煉青銅浮玉玦
雲容濤勢偉且奇
乍出乍沒須臾時
乾篤雪山白盈尺
晴天萬里窺蛾眉
似識詩翁作詩苦
獨擁清妍照環堵
河翻月落夜未央
如虹光氣飛屋梁

詩藪雄渾流麗步驟中程

句

薄糜不繼襖不裹
謳吟猶是鐘球鳴

東園友聞汲仲先生送蔡如愚歸東陽云云語惟善曰此余

秘密藏中休糧方也

黃泰亨

泰亨字亨叔臨川人咸淳間補國學弟子員

句

久約竹松堅晚節病逢蒲柳望秋時

吳文正集皇慶癸丑疾猶娛書不輟手寫邵子觀易吟又自吟云云此其絕筆也

龍仁夫

仁夫字觀復永新人薦爲浙江儒學副提舉不就

江西通志學者稱麟洲先生

題琵琶亭

老大蛾眉負所天尙留餘韻入哀絃江心正好看明月却抱琵琶過別船

隱居通議諸呂家於江州仕宋累朝窮富極貴及北兵至自文煥而下相率納款無一人抗節報國其後有題詩於琵琶亭者云云一日呂老見之揮淚語意深婉信佳句也或云燕五峰右丞偕龍麟洲謁呂文煥酒酣命賦詩以琵琶亭爲題麟洲賦此譏之呂老納賄請改賦旣而好事者流傳

詩藪自義山牧之用晦開用事議論之門元人尤喜模倣如夜深正好看明月云云如何十二金人外猶有當年鐵未銷却愛曹瞞臺上瓦至今猶屬建安年中郎有女能傳業傳得胡笳業不如皆世所傳誦

卽席作

南啓池邊風滿衣
木樨亭下雨霏霏
老夫記得坡仙語
病體難禁玉帶圍

輟耕錄龍麟洲先生過福建憲府設燕命官妓小玉帶佐觴
酒半憲使舉杯謂曰今日之歡皆玉帶爲也願先生酬之以
詩時先生負海內重名雅畏清議又不能違憲使之請遂書
一絕句云云於時舉席稱歎盡歡而散

羅志仁

志仁字壽可號壺秋涂川人元初薦授天長書院山長

絕句

嚼雪蘇郎受苦辛
庾公老作北朝臣
當年龍首黃扉客
猶是衡門一

樣人

山房隨筆三衢留中齋甲辰大魁文山宋瑞丙辰大魁中齋
作相身享富貴壽考三十年仕北爲尙書文山纔登第丁父
憂仕途亦坎壈乙亥糾義兵勤王終以罔功患難中倚之爲
重雖名爲黃扉之貴萬鍾之奉無有也江西羅壺秋詩云云
中齋物色將羅織之亟歸而免

題水村圖

長愛秦郎絕妙詞荒寒暗合輞川詩斜陽萬點寒雅處流水孤村又

一奇

詳錢仲
鼎下

白斑

斑字廷玉錢唐人入元薦授江浙儒學副提舉有湛淵集

湛淵靜語自序湛淵姓名爵里不聞於時家西湖西有泉自竺山來及門而潞湛然下見白石若隔一膜客至呼坐榻就洲

剡源集其賦銅浮漚一篇尤清馴可念詩甚似渡江陳去非而嘗諱言陳去非

宋濂撰墓誌銘長於詩文紫陽方回稱其冠絕古今有英雄大丈夫氣廬陵劉辰翁又言其不爲雕刻苛碎有雲山韶濩之音

春日田園雜興

雨後散幽步村村社鼓鳴陰晴雖不定天地自分明柳處風無力蛙時水有聲幾朝寒食近吾事及躬耕

月泉吟社第十八名唐楚友孤山社白湛淵名珽字廷玉前
聯不束於題而柳處蛙時一聯題意俱足格調甚高結亦不
浮

送詩賞小劄田園春日偶爾分題湖海名流翩其入社其楚
波之及於晉有堯風而謂之唐云云

回送詩賞劄木鐸采詩喜三百篇之典型復見達圖結社數
十八人之地位偶同云云

續演雅十詩

海青羽中虎燕燕能制之小隙沈大舟關尹不吾欺
草食押不蘆雖死原不死未見滌腸人先聞棄簣子
誰令珠玉唾出彼藜藿腸仁人不爲寶良賈宜深藏

嬰啼聞木枝抵乳見茅茹何如百年身反爾無根據
西狩獲白麟至死意不吐代北有角端能通諸國語
纔脫海鶴喙已登方物輿仰面勿啾啾我長非僑如
羯尾大如斛堅車載不起此以不掉滅彼以不掉死
八珍殺龍鳳此出龍鳳外荔枝配江瑤徒誇有風味
灑人薪巨松童山八百里世無奚超勇惆悵渡易水
兩駝侍雪立終日饑不起一覺沙日黃肉屏那足擬

輟耕錄續演雅十詩發揮海青云云者海青俊禽也而羣燕
緣撲之卽墜物受於所制者無小大也草食云云者漠北有
名押不蘆食其汁立死然以他藥解之卽蘇華佗洗腸胃攻
疾疑先服此也誰令云云者和林有尼能吐珠玉雜寶也嬰

啼云云者漠北種羊角能產羊其大如兔食之肥美嬰啼木
枝見山海經所載西狩云云者角端北地異獸也能人言其
高如浮圖纔脫云云者小人長僅七寸夫婦二枚形體畢具
也羯尾云云者西漢有羯尾大於身之半非車載尾不可行
也八珍云云者謂迤北八珍也所謂八珍則醍醐麝沆野駝
蹄鹿唇駝乳麋天鵝炙紫玉漿元玉漿也元玉漿卽馬奶子
灤人云云者取松煤於灤陽卽今上都去上都二百里卽古
松林千里其大十圍居人薪之將八百里也兩駝云云者沙
漠雪盛命兩駝趺其旁終夜不動用斷梗架片氈其上而寢
處於下煖勝肉屏且不起心兵也

今日知何日談詩得偉人閉門方掩雪老硯自回春湖海清尊樂乾坤白屋貧時時看雲色吹落紫綸巾

湛淵遺稿補引珊瑚屑大風振屋積雪壓頭余方撥櫓拙課
二雛讀袁汝南傳聞戶外策策有除雪聲吾西溪子顧余曰
王馬曹中夜思戴安道便拏舟規往及門而返何其興之易
盡也我則不然不見不止俞伯奇北道主人在上人方外友
聞而載酒看來相與賞會臨簷弄翰雪疊疊著腕不暇顧計
勝踐一時不多見於世間也因折飛入園林總是春爲韻人
賦五言仇仁近張仲實鄧善之皆周旋人聞此亦爲我助喜
用餘三韻徵之鮮于伯機樂西溪山水因以自號云至元丁

亥十有二月二十錢唐白珽序

四季六言詩

紅杏綠楊永晝野服柴門散仙莫道無人知處東風都在吟箋
蓮葉吹香澹澹扁舟撐影斜斜驚散一行白鷺東風捲起梨花

至正直記石莊史道原款接鄭禾子實於家賦詩作畫以習
文采白湛淵一日賦六言四季詩意道原愛之求子實爲作
圖湛淵題詩于上蓋湛淵翁也子實壻也詩云云後二首忘
之

張瑛

瑛字仲實

武陵集得飛字

雪天縱游集四顧娛清輝豪家挽不去悠悠款柴扉青陽時未來乃

見花絮飛歡顏既一破酒至不復回客馬儼在門主歌毋庸歸古來
盡簪地荊棘牽人衣

詳白堊下

俞伯奇

案湛淵遺稿補引珊瑚屑伯奇詩下名爛係存个之二字而
清河書畫舫有元人俞行之題燕穆之楚江秋曉圖詩清江
人字缺疑卽伯奇

武陵勝集得是字

朔風何崩騰大雪午未止高人乘興來遠自數千里解韉敞四齋風
采照屏几新詩一揮灑遑惜雪到紙僻居寡賓送俎豆聊復爾樂我
山林友政爾不在是

詳白堊下

仇遠

遠字仁近一字仁父錢唐人至元中爲溧陽州儒學教授自號近村又號山村有山村遺稿

春日田園雜興

一灣新綠護茅廬草細泥鬆已可鋤
野老但知分社酒地官寧復進農書
鶯花眼界人煙外蠶麥生涯穀雨餘
我愛賦歸陶令尹柳邊時見小籃輿

月泉吟社第四十四名社酒農書一聯厥有深意不但全篇清婉而已

同段吉甫泛湖

西湖春碧淨無泥畫舫珠簾傍岸移
寒食清明初過後杏花楊柳乍晴時
從教西日催歌鼓莫放東風轉酒旗
只恐明朝成雨去暗驚濃

綠上高枝

秋日西湖園亭

西湖一曲百泉通
漠漠青山繞梵宮
故國園林春色淨
明朝風雨桂花空
銀笙玉笛清歌外
畫舫珠簾落照中
人物風光兩相稱
兒童遮莫笑山翁

西湖遊覽志仁近工詩文有同段吉甫泛湖詩秋日西湖園亭詩最稱合作

武陵勝集得林字

城中十日雪山中
三尺深我從吳都來
頗畏寒見侵亦念子在野
相從詎無心緬懷梁園遊
豈不勝竹林落落歲寒友
歷歷瑤華音重期

春日和飛蓋西園陰

詳白珽下

書與士瞻上人十首

我本迂疎落拓人滿頭霜雪滿懷春登山有屐身恆健挂壁無弦趣
更眞往歲效官殊慢浪老來學佛離貪嗔却憐衛鶴齊雞輩空費心
機不庇身

野鶴清高六翮輕孤雲萬里去冥冥漢科合應茂才舉唐士曾書遺
教經好趁江南諸老在盡看薊北衆山青錦衣歸日春風滿期醉沙
堤雙玉餅

嬾學羊裘漢子陵亦非解印晉淵明好山好水恆相對浮利浮名不
願爭詩酒每尋朋友共田園都付子孫耕野心眞與閒雲似却笑孤
雲出岫輕

末俗由來不貴儒小夫小婦恣挪揄束書合問山林隱絕迹莫登名

利塗膝上有孫貧亦樂門前無債醉如愚咸平處士真堪羨死守梅
花住裏湖

宦海漂流四十年老來默默守吾玄艱危頗得文章力嫁娶各隨兒
女緣白飯充腸聊當肉好書到手不論錢閒心嬾作邯鄲夢樂取南
窗一枕眠

筆墨生涯獨善身一區花竹四時春無求莫問朝廷事有恥難交市
井人簾外烏衣飛上下窗前絳蕊結輪囷鑑如居士東鄰住肯借霜
毫爲寫真

難得心交左伯桃亦無善相九方臯而今賤子多儒誤自古山人索
價高衆雀豈能知鵠志一雞何足用牛刀獨醒獨醉俱堪樂妙理依
然有濁醪

倦游嬾着小烏巾短髮絲絲白滿簪信手拈書聊慰眼轉頭忘事太
無心笑他杜老頻看鏡愛我昭文不鼓琴喜有山林方外友時攜佳
紙索新吟

北風雨後忽南風頃刻開晴又轉東后土未乾偏有恨漏天難補已
無功小樓兀坐思猿鶴好客相期避燕鴻筆上墨蘭香可掬令人長
憶所南翁

豪氣年來漸掃除簞瓢自樂守臞儒江頭盡醉唐朝士澤畔行吟楚
大夫萬里鯢鵬何必羨一官蟣蝨不如無葛巾草履從人笑莫問青
山落葉枯

江村消夏錄士瞻上人習定好修與余晦翁笑隱長老三世
交矣求余斐章遂信手寫七言十首塞白上人其爲我佛前

懺綺語業至治元年九日山村老友仇遠書於北橋躬行齋

約山中友

望極秋空無片雲
前山歷歷見遙岑
新鴻漸到邊城靜
舊雨不來汀草深
仙李有時曾入夢
伯桃死後少知心
如君真是忘機者
海上鷗盟便可尋

寄宋飲冰

欲近談詩一解頤
停雲空惹思依依
梅花賦就廣平老
楊柳門閒靖節歸
驛路數程征馬瘦
家書千里過鴻稀
思君怕倚闌干北
拄笏看山竟落暉

北窗

北窗隱几樂吾天
莫遣新愁到耳邊
一幅好花供醉舞
半牀涼月伴

閑眠故人自欲辭文叔明主何嘗棄浩然留取長安遮日手養成指甲理朱絃

拜霞嶼待制伯祖墓下

難尋華表與豐碑三尺墳臺三四圍翁仲多年蒼佩剝子孫寒食紙錢稀瘦藤拔地長蛇走灌木維垣野鼠肥遠也久違鄉族去忍將椒酒酌斜暉

高臥

人生天地一蘧廬耕鑿雖勞樂有餘因閱杜詩刪舊稟爲觀義帖習行書山公醉後猶騎馬渭叟閑來只釣魚世道秋風總蕭索何如高臥白雲居

雨餘

兩兩鳴鳩語畫檐
雨餘芳草欲生煙
甕頭酒熟常留客
象外詩成頗類仙
楊子有才猶執戟
淵明無事合歸田
地偏時事人傳少
收拾琴書且晝眠

元友山南山新居

桃柳參差出短牆
小樓突兀看湖光
出門便與青山對
讀易能消白日長
硯石洗來如玉潤
藥苗曬得似茶香
鄰僧亦有通文者
常把詩來惱漫郎

再賦

幽居穩占南山下
人迹稀疏水竹村
轉巷始知猶有路
傍湖更好別開門
酒樽盡日嘗謀婦
詩課閑時略抱孫
孤鶴不來高士少
暗香且伴月黃昏

答胡葦杭

久矣相期物外遊
長風吹不斷閑愁
兩山翼翼青如舞
雙鬢颺颺白
始休蕉鹿夢回天
地枕蓴鱸興到水
雲舟舊藏方鏡明
如月看去看來又
一秋

次胡葦杭韻

曾識清明上巳時
嬾能遊冶

蜂一作蝶

步芳菲絮花半落
雨初過

歌一作

杜宇不鳴春自歸
雙冢年深人祭少
孤山日晚客來稀
江南尚有餘寒在
莫倚東風褪絮衣

送王仙麓使君赴道州暫歸三山

家山小爲離支留
征旆催行莫待秋
應有矮奴騎竹馬
相隨迂吏拜
蘭舟舜山如畫當
樓見楚水浮香繞
郡流念我有親頭
雪白雲龍追

逐恨無山

奉寄恬上人

竹筇輕健草鞵寬
野外消磨半日閑
病葉已霜猶戀樹
片雲欲雨又歸山
燈分寺塔晴偏見
水隔漁家夜不關
媿我莫如沙上鷺
霎時飛去便飛還

閻氏園池

眞妃已返鳳臺仙
獨立池亭思愴然
海岳不傳青鳥信
石房誰伴白雲眠
宮桃移種難生實
院籜初翻又引鞭
凝碧荒涼絃管靜
萍花浮滿釣魚船

江上送友

知爾懷親憶故州
相逢沽酒且遲留
夕陽有恨荒荒白
江水無聲泯

泯流孤鳥出潮投渚尾野廬飛雪壓船頭却愁明月中秋近不得同
登庾亮樓

送劉竹間歸廬陵

驛路梅花漠漠寒
蓑衫絮帽出長安
懸知客久歸心切
自覺交深別語難
春入西江隨馬去
山留殘雪待人看
青原白鷺如相問
十載湖濱只釣竿

道場山

山行龜背路羊腸
伏虎禪師古道場
老木陰中安御坐
白雲堆裏撫僧牀
勺泉清徹涵秋味
尖塔孤撐界夕陽
笑月亭空人影散
松風如雨動天簷

何山

溪轉峰回一徑平山頭白水照人清寺因何氏封山姓客把坡詩證
地名蘿月長隨行道影杉風猶帶讀書聲雲津橋下潺湲急僧濯袈
裟客濯纓

新安郡圃

亭榭凌空眼界寬得閑來此獨憑闌春浮練水蒸城潤雪被黃山入
座寒古樹巢空羣鳥散荒池沙滿碎藻乾白雲在望歸期定不見青
油護牡丹

拜孫花翁墓下

水仙分地葬詩人一片荒山野火焚薦菊有亭今作圃掃松無子漫
留墳蝸牛負殼黏碑石老鶴攜雛入隴雲欲把長簫歌楚些却憐度
曲不如君

兵間有歌舞者

邊塵未定苦無謀年少金多絕不憂野戰已酣紅帕首塗歌猶醉錦
纏頭蛾貪銀燭那知死月戀金尊不照愁亦欲避秦高隱去桃花源
上覓漁舟

寄董無益

郵鈴帶箭髮紛紛何日山深耳不聞遷客無鄉難避禍飢民失業半
充軍馬蹄亂踏湖西雪雁陣平拖塞北雲我亦嬾談今世事自看弔
古戰場文

題小閣

和一園
和氣

斷窗黏紙著方牀四面虛明取向陽氈席坐來終日暖皮簾揭動北
風涼挂餅水滿梅花活折鼎湯鳴芋子香布被蒙頭晝眠熟不知門

外雪洋洋

董靜傳挂冠四聖觀

靜按秋淥洗荷衣問隱孤山隻鶴隨得酒可謀千日醉挂冠猶恨十年遲雲和家有仙人譜石鼎今無道士詩莫對梅花談世事此花曾見太平時

劉悅心入道三茅觀

鵝冠高挂九松巔去結三茅香火緣相國向猶爲道士將門今又出神仙坐看紅日生滄島吟寄青衣入洞天跨鶴歸來雲舍近西風井邑只依然

同楊心卿過孤山訪靜傳不遇自遊和靖祠下明日奉寄二高士

飛仙又向別峯遊竹下閒房且小留滿鬢朔風吹客帽倚闌落日在
漁舟梅花路冷難尋冢葑草田荒半作洲獨往獨來沙鳥怪山空木
短使人愁

酬鄧山房尊師

山房閒伴白雲棲琴不須彈聽者稀北道主人新拜號西州隱士舊
傳衣粵亡未合鷗夷去蜀遠難隨杜宇歸亦欲共君聯石鼎龍頭豕
腹怕相譏

不應聘高士

束書入谷起徵君盥耳淵棲似不聞知有故人來問字喜無逋客爲
移文忍貧羞說黃金盡愛老慵將白髮芸獨倚高樓南北望青天依
舊有閒雲

懷古

劉仲卿要下寄
仲卿四字

吹殺青燈炯

一作
秋

不眠滿衿懷古恨
緜緜江東曾識桓司馬

一作山中
識陶弘景

滄海

一作
海上

難追魯仲連
吳岫

一作
秦樹

月明吟木客
漢宮露冷泣銅仙
何時

一酌桃源酒
醉倒春

一作
東

風數百年

和范愛竹三首

半生豪氣學元龍
湖海惟知敬數公
徒有貞心招隱逸
恨無巨眼識英雄
天衢騎馬衣冠異
雨屋鳴雞杼軸空
西崦東屯何日了
定應愁老浣花翁

秉燭追遊憶盛時
歡悰終較昔年稀
柳多客折涼陰薄
薇少人餐雨綠肥
胡蝶覺來方識夢
海鷗飛去未忘機
相逢且可談風月
莫話興亡與是非

風雨蕭蕭白晝昏
肅襟受此一涼恩
丘園不作軒裳夢
陵谷空遺斧鑿痕
乍可扣舷歌楚澤
何堪抱瑟立齊門
有時散步西原上
共醉田家老瓦盆

問趙元父病

裹飯無因絕往還
惟應帖子報平安
山公馬上花前放
岐伯書從枕上看
貿易近來多北藥
支持強欲著南冠
有時泥醉西園月
只尺梅花共倚闌

贈金蓀壁

黃紙紅旗事已休
莫思入谷有鳴騶
天開東壁圖書府
人立西湖煙雨樓
林淺易尋和靖隱
菊荒空憶魏公遊
客來把玩新題扇
半似鍾繇半似歐

再答元父

駿裏龍媒去未還，獨騎款段客長安。
青黃誰采溝中斷，黑白當從局外看。
尊俎風流陳日月，山林人物古衣冠。
桂花滿袖王孫遠，空倚天風十二闌。

寄趙春洲莫兩山

湖山滿目舊遊空，風景荒涼客路窮。
雨意忽生桐葉外，秋光多在木樨中。
乾坤混混多遊騎，江漢寥寥有斷鴻。
自古隱人多嗜酒，却憐無酒醉新豐。

和兩山二首

世事枰碁入角危，有人袖手只攢眉。
路通巴蜀那須檄，馬立澶淵更要詩。
公竟醉邪從汝笑，樹猶如此信吾衰。
傳聞雙珥消兵氣，猶把葵

心向鬱儀

窮鄉何處覓新豐身世悠悠醉夢中未學伏波尸馬革且隨甫里問
龜蒙檐頭喜有桑榆日兵後那無草木風亦欲飛神遊八極扁舟坦
臥不須篷

讀陳去非集

簡齋吟冊是吾師句法能參杜拾遺宇宙無人同叫嘯公卿自古歎
流離窮塗切切誰憐汝遺恨茫茫不在詩莫道墨梅曾遇主黃花一
絕更堪悲

自跋詩卷後近世習唐詩者以不用事爲第一格少陵無一
字無來處衆人固不識也若不用事云者正以文不讀書之
過耳暇日與里人盛元仁言之余與元仁俱以筆墨受兩山

先生知余之心元仁之心先生之心同矣元仁歸十錦將束
書渡淮輒錄小卷贈行以寄君思若元仁小好詩錄以教我
以寄余思明月天涯千里對面稽不孤矣戊寅七夕前三日
武林仇遠頓首再拜

閒居十詠

階前紫蔓金絲草籬角紅垂錦帶花梓澤平泉易銷歇春留富貴與
詩家

樹隔殘鐘遠欲無野雲漠漠雨疏疏飛蚊盡逐南風去父子燈前共
讀書

仰屋著書無筆力閉門覓句費心機不如花下冥冥坐靜看蜻蜓蛺
蝶飛

鶯花韋曲舊時遊老去閑情已五休却笑東風無檢束又隨飛絮過
南樓

鳥雀喧秋未肯棲狂風吹樹影離披屋邊尙有斜陽在更看山人一
局棋

風挾濃雲起礮車捎窗雨脚亂如麻山中茆屋應安穩不向溪聲送
落花

新竹脩脩綠覆牆讀書門外亦陰涼道人清福不肯受却入西山看
夕陽

翠袖佳人倚暮寒雙禽踏破玉闌干空山月落春風換直作羅浮夢
裏看

茶甌紗帽慣迎賓不是詩人卽道人細雨斜風君莫出綠雲門外有

紅塵

珠簾玉柵綺羅叢猶有承平京洛風
飲罷歸來遊騎少一庭明月夜方中

蟬精雋仇山村閒居絕句優游自得以避亂世氣和詞平若不與世故者在易蠱之上九所謂高尙其事先生有焉

紀事

圩田平沒石田枯秋暑如蒸雨竟無六十年前曾記得步行一直過西湖

金淵集自注淳祐丁未亦旱余始生

句

姓名不入六臣傳容貌堪傳九老碑
老尙留樊素貧休比范丹

癸辛雜識方回年登希歲適牟獻之與之同庚其子成文與
乃翁爲慶且徵友朋之詩仇仁近有句云云且作方句云云
方嘗有句今生窮似范丹於是方大怒褒牟貶已遂摭六臣
之語以此比今上爲朱溫必欲告官殺之諸友皆爲謝過不
從仇遂謀之北客侯正卿正卿訪之徐扣曰聞仇仁近得罪
於虛谷何邪方曰此子無禮遂比今上爲朱溫侯笑曰仇亦
止言六臣今比上爲朱溫者執事也方色變侯遂索其詩之
元本手碎之乃已

魯仕能

句

萬劫灰中藏世界千層浪裏惜儒珍

吳鉞

句

阮藉摩挲青眼舊鄒陽感慨白頭新

李應春

句

象繪蒼英希五老鶴歸華表認千年

羅太岳

句

素絲不改衣冠舊黃道從教日月新

羅太亨

句

且追白社爲耆會縱買黃金肯少年 勢利朋儔隨處有詩章我輩
逐年無

湖南通志元九老題名詩石在平江道巖葆真觀宋遺民魯
仕能年七十三吳鉞魯仕行鄧希恕年七十七方采李應春
年六十九張萬全年六十七羅太岳年六十二羅太亨年六
十皆平江人於至元間擇山水勝處更迭主會凡歷十二年
各題姓名及詩刻於石仕能句云云鉞句云云應春句云云
太岳句云云太亨句云云太亨因會散悼諸友句云云

林清

八音詩

金紫何曾一掛懷石田茅屋自天開絲竿釣月江頭住竹杖挑雲嶺

上來匏實曉收栽藥圃土花春長讀書臺革除一點浮雲慮木筆題
詩酒數盃

百可漫志禮侍菴齋林先生誌祖清避元不仕變易姓名匿
居山寺會府君檢冊寺中見清詰問且曰能詩乎卽以冊號
八音命爲詩應聲云云府君驚羨遂與爲友

元詩紀事卷八

候官陳衍緝

趙孟頫

孟頫字子昂宋秦王德芳之後湖州人宋末用父蔭補官至元二十三年薦授兵部郎中官至翰林學士承旨卒追封魏國公諡文敏有松雪齋集

楊載撰趙文敏公行狀程公鉅夫奉詔搜訪江南遺佚得廿餘人公居首選又獨引公入見公神采秀異珠明玉潤照耀殿庭世祖皇帝一見稱之以爲神仙中人使坐於右丞葉公李之上仁宗聖眷甚隆字而不名嘗詔侍臣曰文學之士世所難得如唐李太白宋蘇子瞻姓名彰彰然常在人耳目今

朕有趙子昂與古人何異閒與左右論公人所不及者數事
帝王苗裔一也狀貌昉麗二也博學多聞知三也操履純正
四也文詞高古五也書畫絕倫六也旁通佛老之旨造詣玄
微七也

湖州府志鷗波亭在今旗纛廟

至正直記一日有二白蓮道者造門求字門子報曰兩居士
在門前求見相公松雪怒曰甚麼居士香山居士東坡居士
邪箇像吃素食的風頭巾甚麼也稱居士管夫人聞之自內
而出曰相公不要恁地焦躁有錢買得物事少頃二道者入
謁罷袖出鈔十錠曰送相公作潤筆之資有庵記是牟教授
所作求相公書松雪大呼曰將茶來與居士喫卽歡笑逾時

而去蓋松雪入國朝後田產頗廢家事甚貧

詩藪元名家稱趙子昂虞伯生楊仲弘范德機揭碩外如元
好問馬伯庸陳剛中李孝光楊廉夫薩天錫傅若金余廷心
張仲舉輩不下十數家視宋人才力不如而篇什差盛步驟
稍端

又元五言古率祖唐人趙子昂規陳伯玉

剡源集古詩沈潛鮑謝自餘諸作猶傲睨高適李翱云

清容居士集松雪翁詩法高踵魏晉爲律詩則專守唐法故
雖造次訓答必守典則

佩楚軒客談趙子昂論作詩用虛字殊不佳中兩聯填滿方
好出處纔使唐以下便不古

木天禁語詩之氣象猶字畫然長短肥瘦清濁雅俗皆在人
性情流出得八法便成妙染而洗吾舊態也此趙松雪翁與
中峰和尚述者

詩家一指綺麗趙松雪神存富貴云云

松雪齋集延祐五年四月廿七日上御嘉禧殿集賢大學士
臣邦甯大司徒臣源進呈農桑圖上披覽再三問作詩者何
人對曰翰林承旨臣趙孟頫作圖者何人對曰諸色人匠提
舉臣楊叔謙上嘉賞久之人賜文綺一段絹一段

南濠詩話元盛時揚州有趙氏者富而好客其家有明月樓
人作春題多未當其意一日趙子昂過揚州主人知之迎至
樓上盛筵相款所用皆銀器酒半出紙筆求作春題子昂援

筆書云春風閨苑三千客明月揚州第一樓主人得甚喜盡
徹席間銀器以贈

岳鄂王墓

鄂王墳下草離離秋日荒涼石獸危南渡君臣輕社稷中原父老望
旌旗英雄已死嗟何及天下中分遂不支莫向西湖歌此曲水光山
色不勝悲

輟耕錄岳王墓詩不下數百篇其膾炙人口者莫如趙魏公
作

麓堂詩話南渡云云句雖佳而意已涉秦越

譏留夢炎詩

狀元曾受宋家恩國困臣強不盡言往事已非那可說且將忠直報

皇元

楊載撰行狀上問留尙書葉右承二人優劣何如公對曰夢
炎向與臣父同在宋朝是時臣甫數歲其或忠或佞臣所不
能知今幸得與夢炎同事天朝夢炎爲人性重厚篤於自信
思慮甚遠善斷國事有大臣之器李所讀之書卽臣所讀之
書李所知所能臣亦無不知無不能上曰卿意豈以夢炎賢
於李哉夢炎在宋狀元及第位至丞相賈似道懷讒誤國罔
上不道夢炎徒依阿取容曾無一言以悟主聽李布衣士乃
能伏闕上書請斬似道是李賢於夢炎明矣李論事厲聲色
盛氣凌人若好己勝者剛直太過故多怨焉卿以夢炎父執
友不敢斥言其非今朕旣見卿之情可爲朕賦詩以譏刺夢

炎公賦詩云云上善卒章之意歎賞不已

癸辛雜識子昂入覲之初上命作詩嘲留忠齋云云留以此
銜之終身云

圭齋集公進詩云云上深善卒章之意出見奉御撒里于幄
殿側告之曰上論賈似道誤國之罪責留夢炎不能言今桑
哥誤國甚于似道我輩緘默他日何以逭此責乎

風月堂雜識帝雖異裔亦知厭薄夢炎之爲人然孟頫之詩
實所以自嘲耳

贈子敬

吾愛子姚子風流如晉人白眼視四海清談無一塵

研北雜志趙子昂嘗謂人曰姚子敬天姿高爽相見令人怒

不見令人思又嘗贈詩云云其爲子昂敬畏如此

懷德清別業

楊林堂下百株梅傲雪凌寒次第開枝上山禽曉啁哳定應喚我早歸來

山堂肆考元趙孟頫有別業在湖州德清縣有詩云云

水東日記趙松雪集懷德清別業第二詩唐錢起詩也但花盡作花落不同耳豈公嘗手書之編類者遂誤收入集耶

題所畫梅竹贈石民瞻

故人贈我江南句飛盡梅花我未歸欲寄相思無別語一枝寒玉澹春暉

松雪齋集原注伯幾有詩見寄云寄聲雪上佳公子飛盡梅

花不見君

萬柳堂卽席

萬柳堂前數畝池平鋪雲錦蓋漣漪主人自有滄洲趣游女仍歌白雪詞手把荷花來勸酒步隨芳草去尋詩誰知咫尺京城外便有無窮萬里思

青樓集解語花姓劉氏尤長於慢詞廉野雲招盧疎齋趙松雪飲於京城外之萬柳堂劉左手提荷花右手舉杯歌驟雨打新荷曲諸公喜甚趙卽席賦詩云云

題圓澤三生公案

川上清風非有着松閒明月本無塵不知二子緣何事苦戀前身與後身

五雜俎嘗愛趙子昂有題圓澤三生公案詩云云此千古第一議論也惜不爲屠黃二公誦之

題陶潛歸去來圖

生世各有時出處非偶然淵明賦歸來佳處未易言後人多慕之效
顰惑媼妍終然不能去俯仰塵埃間斯人真有道名與日月懸青松
卓然操黃花霜中鮮棄官亦易耳忍窮北窗眠撫卷嘗三嘆世久無
此賢

筆精趙子昂題陶潛歸去來圖云云觀此詩子昂之慕淵明
至矣然身事虜朝貽譏後世信能言而行不逮也

絕句

輕輕踏破白雲堆半爲尋僧半探梅僧不逢兮梅未放野猿笑我却

空迴

七修類稿予過演福寺僧房見趙子昂親書探梅訪僧一絕句云云惜公松雪集中失載今寺已爲墳地不知此紙存亡也噫

題息齋竹

李侯寫竹有清氣滿紙墨光浮翠筠蕭郎已遠丹淵死欲寫此君惟此人

六研齋筆記李息齋爲吳興別駕喜寫墨竹用文與可法動筆鬱然非涼薄者可窺余得其一幅作老木二尺叢篠擁之葉皆焦墨所成略不露罅而神韻變動真奇作也趙松雪竹法疎逸與公殊調然亦雅重公其題此幅云云

題商德符學士桃源春曉圖

宿雲初散青山溼落紅繽紛溪水急桃花源裏得春多洞口春煙搖
綠蘿綠蘿搖煙挂絕壁飛流淙一作直下三千尺瑤草離離滿澗阿長松
落落凌空碧雞鳴犬吠自成邨居人至老不相識瀛洲仙客知仙路
點染丹青寄輕素何處有山如此圖移家欲向山中住

詩藪雄渾流麗步驟中程

絕句

溪頭月色白如沙近水樓臺一萬家誰向夜深吹玉笛傷心莫聽後
庭花

詩藪趙子昂云云虞伯生高秋風起玉關西踣鐵歸朝十萬
蹄貌得當時第一匹昭陵風雨夜聞嘶范德機中年江海夢

靈皇夜半聞鐘似上陽一百八聲猶未已更兼雲外雁啼霜
楊仲弘四面青山擁翠微樓臺相向闌天扉夜闌每作遊仙
夢月滿瓊田萬鶴飛陳衆仲東華塵土滿貂裘芍藥闌邊繫
綵舟二十四橋春似海教人腸斷憶揚州李季和西風烏帽
髭鬚拂袖長吟倚暮酣得句不衝京兆尹蹇驢行遍大江
南薩天錫道人已跨龍潭鶴童子能煎雀舌茶一夜山中滿
林雪客來無處覓梅花郝伯常只見星簾挂月鈎銀河依舊
隔牽牛遙憐玉雪佳兒女淚滿西風乞巧樓潘子素江上青
山日欲晡幽花小紙墨模糊華清宮殿生秋草零落滕王峽
蝶圖張仲舉雲巖巖下聘君家長記宵談到曙霞今日隴頭
誰洒飯鷓鴣啼老白桐花等作皆元絕妙境第高者不過中

唐平者多沿晚宋耳

老態詩

老態年來日日添
黑花飛眼雪生髭
扶衰每藉過眉杖
食肉先尋剔齒籤
右臂拘攣巾不裹
中腸慘感淚常淹
移床獨就南榮坐
畏冷思親愛日簷

七修類稿非身處老境不能言之如此真切悲夫

句

江花江草詩千首老盡平生用世心

歸田詩話山谷題浣花醉歸圖云中原未得平安報醉裏眉攢萬古愁能道出少陵心事趙子昂云云亦髣髴得之

又

錦纜牙檣非昨夢鳳笙龍管是誰家

麓堂詩話趙子昂谿上詩云云意亦傷甚

又

雲端雙鳥冷花底一琴閒

詩藪元五言律可摘者趙子昂云云

又

千里湖山秋色淨萬家煙火夕陽多

詩藪七言律可摘者趙子昂云云鄧文原云云虞伯生云云

馬伯庸云云范德機云云楊仲宏云云揭曼碩云云陳剛中

云云吳成季云云李子飛云云雅正卿云云甘久從云云貢

秦甫云云柯敬仲云云余廷心云云薩天錫云云薛玄卿云

云李子搆云云王尙志云云吳楚望云云丁守中云云涂守約云云等皆句格莊嚴詞藻瑰麗上接大歷元和之軌下開正德嘉靖之途今以元人一概不復過目余故稍爲拈出以俟知者

鮮于樞

樞字伯機漁陽郡人至元間爲浙江行省都事官至太常典簿有困學齋集

道園學古錄題鮮于伯機小像歛風沙裘劍之豪爲湖山圖史之樂翰墨軼米薛而有餘風流擬晉宋而無作是以吳興公運畫沙之錐刻希世之玉云云

題屏

廨舍如僧舍官曹似馬曹頭巾終日岸手板或時操

吳禮部詩話鮮于伯機初至婺題詩於屏云云佳句也

湖邊曲

湖邊蕩漿誰家女綠慘紅愁問無語低回忍淚並人船貪得纏頭強
歌舞玉壺美酒不須憂魚腹熊蹯棄如土陽臺夢短匆匆去鴛鴦鎖生
寒愁日暮安得義士擲千金遂令桑濮歌行露

輟耕錄浙省廣濟庫歲差杭城殷實戶若干名充役庫子以
司出納比一家中侵用官錢太多無可爲償府判王某素號
殘忍乃拘其妻妾子女於官又無可爲計則命小舟載之求
食於西湖以貲納官鬼妾鬼馬不肖輩羣趨焉鮮于伯機先
生作湖邊曲云云後王之子孫有爲倡者

武陵勝集得總字

窮冬十日雪戶外曾未踵念我平生友欲往恨不勇茲晨劇命駕相對腹一捧促招東林遠共念北海孔把酒望六合瓊瑤紛總總興極不知休嚴城鐘鼓動

詳白堊下

題高房山墨竹

添陰生研池葉葉秋可數京華客夢醒一片江南雨

江村消夏錄鮮于伯機題高房山墨竹有詩最工余故不能忘詩云云世人但知鮮于善書而不知其吟詠之工故錄而出之以示人耳梅道人戲墨

王大令保母帖四首

撞破煙樓固未然唐摹晉刻絕相懸莫將定武城中石輕比黃閨墓

下塲

姜侯才氣亦人豪
辦折區區漫爾勞
不向驪黃求駟駿
書家自有九方皋

臨摹舊說范新婦
古刻今看李意如
却笑南宮米夫子
一生辛苦學何書

千年鬱鬱閟重泉
暫出還隨劫火煙
靳惜乾坤如有意
流傳君我豈無緣

元詩選按蘇天爵題鮮于伯機詩帖云
鮮于公蚤歲學書媿未能
若古人偶適野見二人輓車行淖泥中
遂悟書法今讀論書諸作可以知其所從入矣

寶璧詩

誰言河水濁鳴鏑約秦境官軍鬧如蟻城守申嚴警竇壁一匹夫欲
汲困短絆慷慨願自効行臺可其請從徒二十八設伏獨園靜邏騎
百蹄翻條來落電影勇士貴一決猶豫失馬猛賞功不踰日簫鼓喧
市井英風激衰輓胡以倍淒冷

困學齋雜錄京兆分司劉御史請予作竇壁詩云云

句

鳥飛青嶂裏人語翠微中

詩數元五言律可摘者鮮于樞云云

吾邱衍

衍字子行錢唐人竹房竹素貞白皆其號有竹素山房集

西湖遊覽志隱居教授居一樓坐學童樓下遣高弟子遞授

之客至童子輒止其登使登乃登廉訪使徐琰聞衍名訪之
衍從樓上呼曰此樓何敢當貴人登也願明日走謁謝琰笑
而去明日竟不謝

山居新話黃子久公望一日與客遊孤山聞湖中笛聲子久
曰此鐵笛聲也少頃子久亦以鐵笛自吹下山遊湖者吹笛
上山乃吾子行也二公略不相顧笛聲不輟交臂而去

絕句

烹茶茅屋掩柴扉雙聳吟肩更撚髭策杖逋仙山下去騷人正是興
來時

閒居錄晚宋之作詩多謬句出游必云策杖門戶必曰柴扉
結句多以梅花爲說塵腐可厭余因聚其事爲一絕云云

別仇仁近

劉伶一鍾事徒然蝴蝶飛來別有天欲語太元何處問西泠橋外斷橋邊

輟耕錄初先生年四十未娶宛邱趙天錫爲買酒家孤女爲妾年飢女嘗事人後夫知妻在先生所訟之因逮妾父母父母至客先生家又僞楮幣事覺因言舍主人先生固弗知因邏捽辱先生南出數百步錄事張君景亮識先生叱邏曰是不知情攝之何爲卽解縱遣歸先生不勝慚明日持玄條緇笠詣仇山村別值晨出因留詩一章云云意將從靈均於斯明日有得遺履於橋上者後衛大隱以六壬筮之得亥子丑順流象曰是其骨朽淵泥九十日矣多寶院僧可權從先生

學聞先生死哭甚哀乃葬先生遺文於後山與其師骨塔相對曰皆吾師乞銘於胡石塘先生

鐵網珊瑚余自至元元貞間客杭得交子行父雖齒在余先甚款密也予往來於杭有年間歸吳門每承以詩或書尺見寄今猶有存者其過山村翁訣別之詩案胡汲仲先生塚銘迺至大四年也越三十一年爲至正改元始見其手跡於盧山甫家感悼之餘爲作七言一首以附於後亦挽之之意云時余六十又四良右

桃花雨樂府一章寄翼之

秦源春夢陽臺晚風散驚紅作秋苑閒陰碧樹搖暖雲茸苔羅水香
氤氲蝶飛不濕煙綿路吳娥怨澀鸞階步參差海羽雙燕來依微石

舞瀟湘回

古詩一首送翼之回吳

游子動歸思南風起秋聲我亦當此時相送難爲情交朋尙如斯况
爾懷父兄三吳亦鄰邦一水非遠程君還姑蘇臺我留鳳凰城兩地
各相望馳心互奔傾流光若頽波彼此卽寓萍浮世苦離散輾轉百
慮縈何能慰予懷握手徒營營

次韻謝錢翼之

筆翰西臺妙文章五鳳樓美才須比玉直道豈如鈎吳苑辭春色江
風散旅愁吾廬正蕭颯二仲得羊求

茵耳徧沃野

茵耳徧沃野瓊芝亦芬芳羣陰掩其茨誰復知爾良我願得此草移

根植崇岡閒攀紫金蕤挹露晞朝陽服食換綠髓輕舉過紫皇招携
三辰游與之同輝光

與鄰寓人隔屋對月夜話

禦寇連牆屋神交得謝瞻

謝有隔屋夜語事

偶逢吾所契共語月當檐微祿終

何補良才尙此淹憑君縱元論未怪發幽潛

鐵網珊瑚右故人吾子行手蹟十二紙皆前後得之于書夾
所藏復恐散落集而存之其爲人見石塘胡先生所爲墓銘
茲不書後三十年爲至元五年乙卯九月九日江村民錢良
佑識

柳枝詞

一逕梨花過雨霑日華浮動碧絲簾軒前插徧垂楊柳看舞春風又

畫簷

答沈堯道贈梨花

山中折花搖白雲一枝贈我寒食春
薄簾隔晴不須捲恐隨蝴蝶飛成塵

七修類稿吾杭吾子行予於舊杭誌中得其詩二首今錄示人則又惜死於無窮也

陳儼

儼字

人至元間召用官至翰林直學士

錢舜舉畫花

雪翁夙號老詞客亂後却工花寫生寓意豈求顏色似錢唐風物記

昇平

西湖志餘錢選雪川人以工畫花鳥名江南陳儼題其畫花
云云

黃玠

玠字伯成四明人有卞山集

湖州府志樂吳興山水因卜居卞山

浙江通志與趙文敏游文敏稱許之

趙碧瀾妾詩

感之以誠感必深應之以真應必捷真情一合了弗離聽我長歌碧
瀾妾碧瀾亦是諸王孫世殊事異老且貧少陵尙愛燕玉暖况是當
時真貴人春衣典盡春寒峭二妾朱顏正姝好忍將羅帶折同心懊
惱浮生頭白早珠鈿翠歷幸僅存此時猶及嫁夫君十二樓頭燕子

去揮手不可留仙裙去妾相悲兩相約既去猶煩送肴酌主君詎忍
覆棄之見此翻令心緒惡一心專天天得知忍著主衣還事誰遂携
衾襪與俱來後君死者當爲尼碧瀾堂下雙溪水使客往來豈知此
不願新歡戀舊恩千萬人中兩人耳

輟耕錄吳興趙公碧瀾宋宗室也老而益貧二妾方少艾因
遣之去咸弗肯嫁數獻肴酒致殷勤焉公於卒也覆諸水曰
慎毋再見昔吾割情忍愛以去爾爾弗我忘祇攪我心耳既
而各與其父母俱至泣而言曰妾家每歲請給足可養贍願
執事終身爲尼以報主恩公遂復留之他日公死果如所言
公有寡女復資育之四明黃伯成先生玠嘗有詩云云

題江山歸興圖

秦望東南遠欲無依稀禹穴向姚虞幾時把酒鄞江上却對鄉山看
此圖

弁山小隱吟錄自序雪水之陽弁山之下有丘岑蔚思搆數
楹以寄朝夕浮遊江海不能自還或靳之曰桑蠶作繭猶知
纏裹其身子漫不爲計空言何裨應之曰余游者也某水某
山遊之寓也苟寓矣又何營之有云云是余所題江山歸興
圖詩也嘗求之則隱之意可見矣

方夔

夔一名一夔字時佐淳安人生宋季自號知非子有富山嬾
橐

句

自鄭有謀歸華氏舍湘無地託王琳
爾身不卹無埋地此恥奚容
更戴天 春盤脆響供雷笋夜焙芳鮮摘露芽
蠶老任眠催作繭
燕來新乳賀成家 畫角吹殘低戍火暮鴉橫斷遠煙村

元詩選集中所載閔忠詩云云謂文文山也誅姦云云謂賈
似道也其忠義之感凜然言外他如云云亦多雅秀之句

劉誥

誥字桂翁廬陵人宋亡年十二以處士終有桂隱集

哭蕭孚有四首

去年九日共登高絕嶺長歌意頗豪今日送君誰共哭一間殯屋大
江皋

畫圖摩詰神情遠詩律蘇州句意清身後生前千古恨荒荒白日下

高城

翰墨周旋二十春
莫年卜宅遂爲鄰
永新門外雙松樹
無復相携踏月人

螺湖橋外草如煙
螺子山前水接天
應有故人來下馬
愁雲深處是新阡

桂隱集原注孚有方厓御史之季子少甚穎異從余游其爲詩短篇高古幽淡追逼韋王長篇豐贍逸宕別自風致皆欲與古人爭衡至元三年丁丑七月一日病死士友傷之以其有才而未著其可憾如逢原敦夫九月九日余旣送殯城東歸塗賦以寄感慨云爾

句

山作登樓色天留隔巷口 雲分潭際樹帆上驛邊洲 落日湖陰
笛涼風水郭秋 一燈遺老髩四海後元春 樹懸山雨白門掩佛
燈紅 村煙茅店午籬蝶棘花晴 燕子樓臺人影瘦海棠池館月
痕孤 桃花浪起春風闊燕子寒生社雨多 鳥斷空山孤樹悄馬
嘶小驛一燈昏 江湖宦客孤舟夜城郭詩翁白髮春 燕子池塘
詩句好蒲花簾幕酒杯深 君如礪刃千牛解我似車輪四角方
刺繡簾櫳鶯語倦讀書庭院絮飛忙 草意欲供新得句桃花猶記
舊來人

元詩選律詩多佳句如云云當時諸老宿評以爲高逼古人
云

彥章吉水人

題廬陵義士傳

淮海風迴吹血腥青原不改舊時青中朝將相論功賞不及江南一
白丁

江西通志劉彥章與劉桂隱劉申齋講學有詩名其題廬陵
義士傳絕句云云爲時傳誦

陸文圭

文圭字子方江陰人宋咸淳初以春秋中鄉選延祐設科再
中鄉舉以老疾不應召卒於家

挽貢仲章學士

才優如貢禹經行復精純海內多知己江東尙有人林泉隱君子台

閣古名臣九轉丹成去青山宰木春

牆東類藥自注貢臨終夢九轉丹成生羽翼之句

鹿葱絕句

丹葩信不類芊蒿雨後常抽綠玉條此草豈宜充鹿食瘦莖却比沈郎腰

牆東類藥自注沈約作鹿葱詩云爾非芊與蒿豈充麋鹿食
讒者取此詩以白梁武帝大怒約以憂死今按此詩亦未見
顯然譏刺何爲得罪但此花丹色略有斑點似鹿紋所以得
名非謂可以充鹿之食也

黃庚

庚字星甫天台人有月屋漫橐

枕易

越中詩社試題部魁

古鼎煙銷倦點朱
脩然高臥夜寒初
四簷寂寂半牀夢
兩鬢蕭蕭一卷書
日月冥心知代謝
陰陽回首驗盈虛
起來萬象皆吾有
收拾乾坤在草廬

月屋漫叟考官李侍郎應祈批詩題莫難於枕易自非作家
大手筆詎能模寫蓋以其不涉風雲雨露江山花鳥此所以
爲難予閱三十餘卷鮮有全篇純粹正如披沙揀金使人悶
悶忽見此作若紛紛盆盎中得古疊洗把玩不忍釋手此詩
起句倦字便含睡意頷聯氣象優游殊不費力曲盡枕易之
妙頸聯冥心回首四字極其精到結句如萬馬橫奔勢不可
遏且有力量全篇體製合法度音調諧宮商三復降歎此必

騷壇老手望見旗鼓已知其爲大將也冠冕衆作誰曰不然

秋色

山陰詩社中選

憑高望不及望斷動愁情落日淒涼處西風點染成丹楓明野驛白水浸江城馬上人回首戎戎黯客程

案以上二詩中選及評語既見月屋漫橐復見張觀光屏巖小稿未知孰是

張觀光

觀光字直夫東陽人

梅魂

夢覺羅浮迹已陳至今想像事如新相思一夜窗前月似見三生石上春的的孤芳冰氣魄疎疎冷蕊雪精神料應楚些難招至欲倩花

光爲寫真

屏巖小稿武林試中選

虞德觀

德觀名未詳集從兄

句

我因國破家何在君爲唇亡齒亦寒

道園遺稿從兄德觀父與集同出榮州府君宋亡隱居不仕
而歿集來吳門省墓從外親臨邛韓氏得兄遺蹟有云云不
知爲誰作也撫誦不覺流涕

YORK UNIVERSITY
JUN 5 - 2001
EAST ASIAN STUDIES

YORK UNIVERSITY
JUN 5 - 2001
EAST ASIAN STUDIES

YORK UNIVERSITY
JUN 5 - 2001
EAST ASIAN STUDIES

乃

